

麟臺故事

麟

臺

故

事

進麟臺故事申省原狀

朝奉大夫守祕書少監程俱奏竊見車駕移蹕以來百
司文書例從省記按以從事蠹敝或生日者朝廷復置
祕書省稽參舊章稍儲俊造而臣濫膺盛選待罪省貳
竊以謂典籍之府憲章所由當有記述以存一司之守
輒采摭見聞及方冊所載法令所該比次爲書凡十有
二篇列爲五卷名曰麟臺故事繕寫成二冊詣通進司
投進如有可采許以副本藏之祕省以備討論謹錄奏
聞

案北山集載此篇繕寫成二冊句下云詣都堂呈納
所有進本欲乞批狀送通進司收接投進仍乞以副

本藏之省閣以備討論謹具
申尚書省與此書字句互異
伏候敕旨九月十九日奉
聖旨依奏右劄送中書程舍人紹興元年九月二十日

麟臺故事卷首

麟臺故事目錄

武英殿聚珍版原本

卷一

沿革

省舍

儲藏

卷二

脩纂

職掌

卷三

選任

卷四

官聯



卷五

恩榮

祿廩

臣等謹案麟臺故事五卷宋程俱撰俱字致道衢
州開化人舉進士試南宮第一廷試中甲科歷官
徽猷閣待制封新安縣伯累贈少師玉海載宋元
祐中宋匪躬作館閣錄紹興元年程俱上麟臺故
事淳熙四年陳騭續爲館閣錄蓋一代翰林故實
具是三書宋錄已亡陳錄僅存而亦稍譌闕是書
則自明以來自說郛所載數條外別無傳本惟永

樂大典所載頗爲繁夥排比條貫猶可成書所記
皆宋初館閣之事典章文物燦然可觀蓋紹興元
年初復祕書省以俱爲少監故俱作是書皆得諸
官府舊章最爲詳備如東都事略邢昺傳載由侍
講學士遷工部侍郎不著加中散大夫宋綬傳載
召試中書不著遷大理評事宋史韓琦傳載由通
判淄州入直集賢院不著爲太常寺丞及太子中
允王陶傳載爲太子中允不著編校昭文館書籍
孫洙傳亦不著嘗爲於潛令及編校祕閣書籍而

皆見于是書又如玉海引謝泌傳泌上言請分四
庫書籍人掌一庫事在端拱初而其一百六十八
卷又載此事于天聖五年前後自相刺謬據此書
所載則在咸平之初又續通鑑長編載咸平二年
七月甲寅幸國子監還幸崇文院而此日之後又
有癸丑則是月之內不容先有甲寅顯然舛誤據
是書乃是七月甲辰如此之類凡百餘條皆足以
攷證異同補綴疎漏于掌故深爲有裨原本文獻
通攷作五卷俱奏進是書又稱凡十有二篇今篇

名散見于永樂大典中者曰沿革曰省舍曰儲藏
曰脩纂曰職掌曰選任曰官聯曰恩榮曰祿廩祇
存其九謹依類哀輯仍爲五卷至陳騏館閣錄所
載曝書會餞會及大宴學士院三條俱云出麟臺
故事然引其事而不載其詞殆廣孝等排纂之時
刊除重複誤削前而存後當時編輯無緒卽此可
見一端今亦無從補入惟俱北山集中載有後序
一篇竝附錄之以存其舊焉乾隆四十一年五月

恭校上

總纂官侍讀學士臣陸錫熊

侍講學士臣紀昀

纂脩官主事臣任大椿

麟臺故事卷一

宋程俱撰

沿革

國初循前代之制以昭文館史館集賢院爲三館通名

之曰崇文院

案宋李燾續資治通鑑長編云太宗初卽位因臨幸三館卽詔有司度左昇龍門東

北舊車輅院別建三館命中使督工徒晨夜兼作其棟宇之制皆親所規畫自經始至畢功臨幸者再太平興國三年二月丙辰朔詔賜名爲崇文院西序啓便門以備臨幸盡遷舊館之書以實之院之東廊爲昭文書南廊爲集賢書西廊有四庫分經史子集四部爲史館書四庫書籍正副本凡八萬卷山堂攷索引王巖叟重脩祕閣記云太平興國二年命有司度地昇龍門左三年畢工宋史本紀云二年九月幸新脩三館三年二月以

三館新脩書院爲崇文院諸書直館至校勘通謂之館

所載詳略不同與此互證悉合

職必試而後命不試而命者皆異恩與功伐或省府監司之久次者元豐官制行盡以三館職事歸祕書省官自監少至正字皆爲職事官至元祐中又舉試學士院入等者命以爲校理校勘供職祕書省若祕書省官則不試而命至于進擢之異待遇之渥資任之優選除之遴簡書之略蓋不與他司等也

端拱元年五月辛酉詔置祕閣于崇文院中堂

案續通鑑長編

端拱元年五月辛酉置祕閣于崇文院分三館之書萬餘卷以實其中命吏部侍郎李至兼祕書監右司監直

史館宋泌兼直祕閣右贊善
大夫史館檢討杜鎬爲校理
按六典祕書省中外三閣
掌典圖書古今文字皆在禁中
兩漢或徙金馬門外歷
代不常其處唐季亂離中原多故
儒雅之風幾將墜地
故百王之書蕩然散失
蘭臺延閣空存名號
上崇尙儒術屢下明詔訪求羣書
四方文籍往往而出未數年閒
已充牣于書府矣至是乃于史館建祕閣仍選三館書
萬餘卷以實其中及內出古畫墨跡藏其中凡史館先
貯天文占候讖緯方術書五千十二卷圖畫百十四軸
盡付祕閣有晉王羲之獻之庾亮蕭子雲唐太宗明皇

顏真卿歐陽詢柳公權懷素懷仁墨跡顧愷之畫維摩
詰像韓幹馬薛稷鶴戴嵩牛及近代東丹王李贊華千
角鹿西川黃筌白兔亦一時之妙也

端拱二年八月李至等言王者藏書之府自漢置未央
宮卽麒麟天祿閣在其中命劉向揚雄典校皆在禁中
書卽內庫書也東漢藏之東觀亦在禁中也至桓帝始
置祕書監掌禁中圖書祕記謂之祕書及魏分祕書爲
中書而祕書監掌藝文圖籍之事初以祕書屬少府故
王肅爲祕書監表論不應屬少府以爲魏之祕書卽漢

之東觀因是不屬少府而蘭臺亦有所藏之書故薛夏
云蘭臺爲外臺祕書爲內閣然則祕閣之書藏之于內
明矣晉宋以還皆有祕閣之號故晉孝武好覽文藝敕
祕書郎徐廣典祕書閣輯四部三萬餘卷宋謝靈運爲
祕書監補祕閣之遺逸齊末兵火延燒祕閣經籍遺散
梁江子一亦請歸祕閣觀書隋寫祕閣之書分爲三品
于觀文殿東西廊貯之然則祕閣之設其來久矣及唐
開元五年亦于乾元殿東廊寫四庫書以充內庫命散
騎常侍褚無量祕書監馬懷素總其事至十三年乃更

爲集賢殿因置集賢書院雖沿革不常然祕閣之書皆
置于內也自唐室陵夷中原多故經籍文物蕩然流離
近及百年斯道幾廢國家承衰弊之末復興經籍三館
之書訪求漸備館內復建祕閣以藏奇書總羣經之博
要資乙夜之觀覽斯實出于宸心非因羣下之議也況
睿藻宸翰盈編積簡則其奧祕非復與羣司爲比然自
建置之後寒暑再周顧其官司未詳所處乞降明詔令
與三館竝列至于高下之次先後之稱亦昭示明文著
爲定式其祕書省旣無書籍元隸京百司請如舊制詔

曰朕肇興祕府典掌羣書仍選名儒入直于內文籍大
備粲然可觀處中禁以宏開非外司之爲比自今祕閣
宜次三館其祕書省依舊屬京百司

淳化三年五月詔增脩祕閣先是度崇文院之中堂爲

祕閣之址而層宇未立書籍止置偏廳廡內至是始脩

之八月閣成

案玉海淳化三年五月增脩祕書閣八月成戊辰賜宰臣李昉以下及三館宴賜詩

景德四年五月詔分內藏西庫地廣祕閣

案續通鑑長編引宋

敏求東京記曰國初置景福內庫太平興國三年改名內藏相對有封樁庫景德四年賜名內藏西庫據此書

則賜名當在

五月以前